



agappaz

ESTATUTOS DA ASOCIACIÓN GALEGO-PORTUGUESA DE EDUCACIÓN PARA A PAZ

CAPÍTULO I DA ASOCIACIÓN EN XERAL

Artigo 1º.- 1.- Constitúese a asociación educativa denominada Asociación Galego-Portuguesa de Educación para a Paz (AGAPPAZ), de carácter educativo e sen ánimo de lucro, das previstas na Lei orgánica 1/2002, do 22 de marzo, reguladora do dereito de asociación.

2.- A asociación rexerese por estes estatutos, pola Lei orgánica 1/2002, do 22 de marzo e pola demais lexislación existente en materia de asociacións que lle sexa aplicable.

Artigo 2º.- O domicilio principal e permanente da asociación radicará na localidade de Vigo, rúa Pracer nº 1ª-3º G C.P. 36202 teléfono 986 438584, apdo. de correos 577, correo electrónico agappaz@mundo-r.com

Artigo 3º.- A asociación, de carácter internacional, en función dos seus fins e do emprazamento do seu domicilio social, exercerá fundamentalmente as súas actividades no ámbito territorial de Galiza e Portugal.

Artigo 4º.- 1.-A asociación constitúese por tempo indefinido e só se disolverá, conforme a estes estatutos, pola vontade dos seus asociados e asociadas expresada en Asemblea Xeral Extraordinaria ou polas causas previstas na lexislación vixente.

2.- A asociación rexerese segundo os principios democráticos contidos no marco da Constitución e o resto do ordenamento xurídico.

Artigo 5º.- 1.- Son fins principais da asociación:

a.- Promover e difundir a Educación para a paz, os dereitos humanos e o desenvolvemento e a cultura da paz en todos os ámbitos educativos, tanto na educación formal como na non formal e na informal, desde unha perspectiva positiva, crítica e non violenta.

b.- Promover o diálogo, a reflexión, a comunicación, o intercambio de experiencias e opinións, a formación e o traballo cooperativo entre os seus membros, desde e en torno ós principios da educación para a paz, así como con outras asociacións ou organizacións, de xeito que sumemos esforzos e presenza nun contexto cada vez maior.

c.- Fomentar a investigación no ámbito da educación para a paz, os dereitos humanos e o desenvolvemento.

d.- Difundir e elaborar materiais didácticos no ámbito da educación para a paz, os dereitos humanos e o desenvolvemento.

e.- Propor medidas e asesorar ás administracións educativas sobre propostas e programas educativos no ámbito da educación para a paz, os dereitos humanos e o desenvolvemento.

f.- Participar en campañas que incidan na construción social da paz e na cultura de paz.



agappaZ

2.- Para levar a cabo os seus fins, poderá a asociación organizar as seguintes actividades:

- a.- Organizar cursos, xornadas, encontros, congresos, seminarios, etc.
- b.- Fomentar equipos de investigación.
- c.- Editar boletíns, revistas e calquer tipo de publicación.
- d.- Participar en campañas de sensibilización e reivindicación dos dereitos humanos e principios da educación e cultura de paz.
- e.- Facer propostas e asesorar as administracións educativas.

Os beneficios que se obteñan por calquera concepto destinaranse exclusivamente ó cumprimento destes fins, sen que se poidan repartir entre os asociados e asociadas nin outras persoas físicas ou xurídicas con interese lucrativo.

CAPÍTULO II DAS ASOCIADAS E ASOCIADOS

Artigo 6º.- 1- Poderán ser integrantes da asociación todas aquelas persoas físicas, con plena capacidade de obrar, tras o acordo do seu órgano competente, que non teñan débedas pendentes coa asociación e que reúnan os seguintes requisitos:

- a. Compartir os obxectivos da Asociación.
- b. Non ter unha práctica destrutiva coa asociación ou cos principios e obxectivos que a orientan.

2.- Os acordos de admisión de asociados e asociadas tomaraos a Xunta Directiva, unha vez recibida a petición por escrito da persoa que desexa ser admitida.

Artigo 7º.- 1.- A condición de asociado ou asociada pérdese:

- a. Por vontade propia.
- b. Por falta de pagamento de cotas.
- c. Por incumprimento das súas obrigas ou a realización de accións que prexudiquen gravemente os intereses da asociación, logo do expediente disciplinario, con audiencia da persoa interesada.
- d. Por falecemento da persoa física.

2.- A expulsión de asociados e asociadas nos supostos dos apartados b) e c) do parágrafo anterior, será acordada pola Xunta Directiva, logo da audiencia da persoa interesada. O acordo de expulsión deberá ser ratificado pola Asemblea Xeral Extraordinaria e contra a súa resolución poderase recorrer ante a xurisdición ordinaria.

Artigo 8º.- Os asociados e asociadas teñen os seguintes dereitos:



agappaz

1. Participar nas actividades da asociación e nos órganos de goberno e representación, exercer o dereito de voto, así como participar na Asemblea Xeral, de acordo cos estatutos.
2. Ser informada/o da composición dos órganos de goberno e representación da asociación, do seu estado de contas e do desenvolvemento da súa actividade.
3. Ser ouvida/o con carácter previo á adopción de medidas disciplinarias contra el ou ela e ser informada/o dos feitos que dean lugar ás ditas medidas, debendo motivarse o acordo que, no seu caso, imponha a sanción.
4. Impugnar os acordos dos órganos da asociación que estime contrarios á lei ou ós estatutos.

Artigo 9º.- Son obrigas dos asociados e asociadas:

- a. Compartir as finalidades da asociación e colaborar para a súa consecución.
- b. Pagar as cotas que se establezan.
- c. Desempeñar os cargos para os que foron elixidas ou elixidos.
- d. Acatar e cumprir os acordos validamente adoptados polos órganos de goberno e representación da asociación.
- e. Acatar o contido dos estatutos.
- f. Ter unha boa conduta individual e cívica.

CAPÍTULO III DOS ÓRGANOS DA ASOCIACIÓN

Artigo 10º.- A dirección e administración da asociación serán exercidas pola presidenta ou presidente, a Xunta Directiva e a Asemblea Xeral.

Artigo 11º.

1.- A **presidenta** ou **presidente** da asociación será designada ou designado pola Asemblea Xeral entre as asociadas e asociados para un período de tres anos. Será asistida/o nas súas funcións por unha vicepresidencia, que o substituirá nos casos de vacante, ausencia ou enfermidade.

2.- O presidente ou presidenta terá as seguintes atribucións:

- a. Representar a asociación perante calquera organismo público ou privado.
- b. Convocar e presidir as sesións que celebre a Xunta Directiva; presidir as sesións da Asemblea Xeral; dirixir as deliberacións dunha e outra, e decidir con voto de calidade, no caso de empate.
- c. Executar os acordos adoptados pola Xunta Directiva e a Asemblea Xeral.
- d. Ordenar os pagamentos acordados validamente.
- e. Asinar as actas, certificados, pagamentos e outros documentos da asociación xunto co secretario ou secretaria ou membro da Xunta Directiva a quen lle corresponda a elaboración do documento de que se trate.

Artigo 12º.



agappaz

1.- A **Xunta Directiva** estará formada polo presidente ou presidenta da asociación, un/ha vicepresidente/a, un/ha secretario/a, un/ha tesoureiro/a e oito vocais, en igual número por ambos países.

2.- Os cargos que compoñen a Xunta Directiva serán desempeñados de forma gratuíta, sen prexuízo do dereito a ser reembolsados dos gastos debidamente xustificadas en que poidan incurrir por actuacións relacionadas coa asociación.

As persoas elixidas para estes cargos deberán carecer de interese económico nos resultados da actividade levada a cabo pola asociación.

3.- O cargo de tesoureira/o poderá ser bipersoal.

4.- A Asemblea Xeral será a competente para elixir os cargos da Xunta Directiva. A súa duración será por un período de tres anos, aínda que poden ser obxecto de reelección.

4.- Os cargos cesarán na súa función por:

a) facelemento da persoa física ou extinción da persoa xurídica.

b) renuncia voluntaria.

c) transcurso do prazo para o que foron elixidos.

d) acordo de cesamento da Xunta Directiva ou de calquera dos seus membros adoptado por $\frac{3}{4}$ dos asociados e asociadas reunidos en Asemblea Xeral extraordinaria convocada para tal efecto.

A renuncia e o transcurso do prazo non dan lugar ó cesamento automático, senón que se deberá facer un efectivo traspaso de poderes con entrega de documentación e posta ó día da persoa sucesora.

As vacantes que se puideran producir durante o mandato de calquera dos membros da Xunta Directiva, serán cubertas provisoriamente entre os ditos membros ata a elección definitiva pola Asemblea Xeral. En calquera caso, a Xunta Directiva debe estar integrada como mínimo por 3 persoas, que exercerán as funcións de presidencia, secretaría e tesouraría.

Artigo 13º.- A Xunta Directiva terá as seguintes atribucións:

1. Programar e dirixi-las actividades asociativas.

2. Levar a xestión administrativa e económica da asociación.

3. Someter á aprobación da Asemblea Xeral o orzamento anual de ingresos e gastos, así como o estado de contas do ano anterior.

4. Convocar e fixar a data da Asemblea Xeral.

5. Propoñerlle á Asemblea Xeral a fixación de cotas ordinarias e extraordinarias para as persoas asociadas.

6. Designar as comisións de traballo ou seccións que se estimen oportunas para o bo funcionamento da asociación.

7. Ditar normas interiores de organización e exercer cantas funcións non estean expresamente asignadas á Asemblea Xeral.

8. Resolver sobre as solicitudes de ingreso de novos asociados.

9. Propoñer o plan de actividades da asociación á Asemblea Xeral para a súa aprobación, impulsando e dirixindo as súas tarefas.

10. Resolver os procedementos disciplinarios que se instrúan.

11. Aquelas que non veñan atribuídas expresamente á outro órgano da asociación.



Artigo 14º.

1.- A Xunta Directiva será convocada polo presidente ou presidenta, a iniciativa propia ou a petición de calquera dos seus componentes.

2.- Para que os acordos da Xunta Directiva sexan válidos, deberán ser adoptados por maioría de votos dos membros asistentes, sendo necesaria a concurrencia, polo menos, da metade máis un dos seus membros e, en todo caso, do presidente ou vicepresidente e o secretario ou persoa que o substitúa.

O secretario ou secretaria, no seu defecto, o/a vocal que o/a substitúa, levantará acta das sesións, que se transcribirá ó libro de actas.

Artigo 15º.- Os membros da Xunta Directiva presidirán as comisións que a propia Xunta acorde constituír, co fin de delegar nelas a preparación de determinados actos ou actividades, ou de acadar delas as informacións necesarias. Formarán parte das ditas comisións o número de asociados que acorde a Xunta Directiva, a proposta dos seus respectivos presidentes.

Artigo 16º.- A **Asemblea Xeral** de asociados e asociadas é o órgano de expresión da vontade da asociación e estará formada por tódolos integrantes desta. O presidente e o secretario da asemblea serán o presidente e o secretario da Xunta Directiva.

Artigo 17.- a) A Asemblea Xeral reunirse con carácter ordinario como mínimo unha vez ó ano, de preferencia no marco do Encontro Galego-Portugués de Educación para a Paz e alternando xeograficamente entre os territorios galego e portugués, e con carácter extraordinario cantas veces o acorde a Xunta Directiva, ou o soliciten a porcentaxe que se establece no regulamento.

b) As sesións ordinarias da Asemblea Xeral poderán ser abertas ao público.

Artigo 18º.- A Asemblea Xeral Ordinaria reunirse en xeral durante o período lectivo. Tanto a Asemblea Ordinaria como a Extraordinaria serán convocadas con 15 días de antelación polo/a presidente/a da Xunta Directiva e incluírán a proposta de orde do día e a documentación necesaria para o seu correcto desenvolvemento.

A comunicación farase através dos medios máis eficientes dispoñíbeis directamente ás asociadas e asociados.

Artigo 19º.- Serán competencias da Asemblea Xeral Ordinaria:

1. Aprobar o plan de actividades.
2. Examinar e aprobar as contas e balances do exercicio anterior.
3. Aprobar os presupostos de ingresos e gastos para cada exercicio.
4. Exame e aprobación das contas.

Artigo 20º.- Serán competencias da Asemblea Xeral Extraordinaria:

1. Modificar os estatutos da asociación.
2. Elixir e cesar os integrantes da Xunta Directiva.



agappaz

3. Aprobar a federación con outras asociacións.
4. Autorizar o alleamento, gravame ou hipoteca de bens sociais.
5. Acordar a disolución da asociación.
6. Designar os/as liquidadores/as.
7. Ratificar a expulsión de asociados e asociadas a proposta da Xunta Directiva.
8. Solicitar a declaración de utilidade pública da asociación.
9. Aprobar o regulamento de réxime interno da asociación.
10. As que sendo de competencia da asemblea ordinaria, por razóns de urxencia ou necesidade, non poidan agardar a súa convocatoria, sen grave prexuízo para a asociación.
11. Tódalas non conferidas expresamente á Asemblea Xeral Ordinaria ou a Xunta Directiva.

Artigo 21º. A Asemblea Xeral quedará validamente constituída sempre que concorran a metade máis un dos asociados ou asociadas na primeira convocatoria ou inmediatamente despois en segunda convocatoria, con calquera número de asistentes, pero, en todo caso, coa presenza das persoas que exercen a presidencia ou vicepresidencia e a secretaría ou vocal que a substitúa. Non será preciso prazo de espera para a segunda convocatoria nas sesións da asemblea xeral ordinaria.

Artigo 22º.- Os acordos adoptados deberán selo polo voto afirmativo da maioría simple dos asistentes con dereito a voto, excepto os relativos ós apartados do 1 ó 7 do artigo 21º, que requirirán maioría de dous terzos. Posteriormente levaranse os acordos ó libro de actas que asinarán o/a presidente/a e o/a secretario/a da Asemblea. A acta deberá ser lida na seguinte sesión celebrada pola Asemblea Xeral e aprobada pola maioría dos membros presentes.

Artigo 23º.- Os acordos adoptados conforme ós preceptos anteriores obrigarán a tódolos/as asociados/as, incluso ós/ás non asistentes.

As sesións abranse cando así o determine a presidenta ou presidente. Seguidamente procederase por parte da persoa secretaria á lectura da acta da asemblea anterior que deberá ser aprobada.

Posteriormente, o secretario procederá a presentar a orde do día, incorporando as propostas que as e os asistentes puideren formular e non resulten rexeitadas pola xunta directiva ou pola propia asemblea. Cada punto será informado polo membro da Xunta Directiva ou persoa que corresponda, procedéndose ó debate e a aprobación dos correspondentes acordos nos termos contidos nestes estatutos, segundo a materia de que se trate.

Artigo 24º.- Os acordos que vaian contra estes estatutos ou infrinxan os fins da asociación poderán ser recorridos en reposición diante da Asemblea Xeral. A partir da resolución do recurso de reposición, quedará expedita a vía para recorrer perante a xurisdición ordinaria.



agappaZ

Artigo 25º.- 1. O secretario ou secretaria recibirá e tramitará as solicitudes de ingreso, levará o ficheiro e o libro rexistro de asociados e terá ó seu cargo a dirección dos traballos administrativos da entidade. Correspóndelle, así mesmo, realizar as convocatorias, custodiar as actas e expedir certificacións destas co visto e prace do presidente ou presidenta. Tamén levará o inventario dos bens da asociación nun libro establecido para este efecto.

2. Nos casos de ausencia, vacante ou enfermidade da/o secretaria/o, a presidencia designará entre os membros vocais a persoa que desenvolva esta función.

Artigo 26º.- 1. A/O tesoureira/o recadará e custodiará os fondos pertencentes á asociación, dará cumprimento ás ordes de pagamento que expida a/o presidenta/e, levará a contabilidade da asociación, tomará razón e levará conta dos ingresos e dos gastos asociativos, elaborará o borrador de orzamentos da asociación así como as contas de resultados e balances.

2. A/O tesoureira/o ten a obriga de proceder ó peche do exercicio orzamentario antes do 15 de decembro, co fin de que as contas estean a disposición dos membros da asociación nos quince días anteriores á celebración da asemblea ordinaria.

Artigo 27º.- Os e as vocais terán as seguintes atribucións:

1. Realizar programas e propostas de actuación.
2. Desempeñar os traballos que lles sexan encomendados pola Xunta Directiva.

CAPÍTULO IV REXIME ECONÓMICO

Artigo 28.- A asociación, no momento de iniciar as súas actividades, dispón dun patrimonio de cero euros. O peche do exercicio económico coincidirá co do ano natural.

Artigo 29º.- A asociación funcionará en réxime de presuposto anual, con partidas diferenciadas de ingresos e gastos. O borrador de presuposto será elaborado pola/o tesoureira/o da asociación, que deberá telo preparado antes do un de xaneiro de cada ano, a fin de que poida ser aprobado na Asemblea Xeral Ordinaria, ou en todo caso antes da reunión desta.

Artigo 30º.- A asociación manterase dos seguintes recursos:

1. As cotas anuais dos/as asociados/as.
2. As cotas extraordinarias que propoña a Xunta Directiva e sexan aprobadas pola asemblea.
3. As doazóns ou subvencións que poidan conceder órganos públicos, entidades privadas ou particulares.
4. Os ingresos que se poidan recibir polo desenvolvemento das actividades da asociación.
5. Calquera outro ingreso admitido pola normativa vixente para actividades non lucrativas.



Artigo 31°.- A Asemblea Xeral Ordinaria, a proposta da Xunta Directiva, aprobará tanto as cotas ordinarias como as extraordinarias que non serán reintegrables en ningún caso. O recadado dedicarase a atender as necesidades da asociación.

Artigo 32°.- Anualmente, con referencia ó último día do exercicio económico de cada ano, elaboraranse as contas, que se formalizarán nunha memoria, que será posta a disposición dos/as asociados/as, durante un prazo non inferior a 15 días ó sinalado para a celebración da Asemblea Xeral Ordinaria, que deberá aprobalas ou censuralas.

Artigo 33°.- Para a disposición de fondos das contas que a asociación ten nas entidades bancarias será necesaria a sinatura conxunta da/o presidenta/e e da/o tesoureira/o ou persoas en quen deleguen.

Artigo 34°.- Como entidade sen ánimo de lucro, en ningún caso poderán ser distribuídos entre os/as asociados/as os recursos obtidos pola asociación.

CAPÍTULO V DO REGULAMENTO DE REXIME INTERNO

Artigo 35°.- O regulamento de réxime interno, no seu caso, desenvolverá aquelas materias non contempladas directamente nestes estatutos, como o procedemento de elección dos membros da Xunta Directiva e o procedemento disciplinario, e non pode ir en ningún caso en contra do estipulado neles. En todo caso, o funcionamento interno da asociación estará sometido ó ordenamento xurisdiccional civil.

CAPÍTULO VI MODIFICACIÓN DE ESTATUTOS E DISOLUCIÓN DA ASOCIACIÓN

Artigo 36°.- Os ditos estatutos só poderán ser modificados por acordo da Asemblea Xeral Extraordinaria convocada para tal efecto, adoptado polas 2/3 partes dos asociados. A proposta de convocatoria deberá ir acompañada do texto das modificacións propostas.

Artigo 37°.- A asociación disolverase voluntariamente por acordo dos asociados adoptado polas 2/3 partes dos asistentes á Asemblea Xeral Extraordinaria convocada para tal efecto.

Artigo 38°.- Acordada a disolución, a Asemblea Xeral Extraordinaria designará tres asociados/as liquidadores, que xunto o/a presidente e o/a tesoureira/a, procederán para efectuar a liquidación dos bens, pagando débedas, cobrando créditos e fixando o haber líquido resultante.



agappaZ

Artigo 39º.- O haber resultante, unha vez efectuada a liquidación, doarase a outra asociación non lucrativa e inscrita na comunidade autónoma galega ou no estado portugués que teña iguais ou similares fins que os desta asociación.

O xustificante da doazón será presentado no Rexistro de Asociacións correspondente para proceder á inscrición da disolución da asociación.